

EUSKALERRIRA BEGIRA

Lenengo nai nire aldetik
auxe dot ene barnean,
emen, agertu dan sinismena
bizi dedilla gurean;
kristau zintzoak bene-benetan,
poztuten sinismenean,
emengo lanak amaitukeran
poza dagigun bestean.

Euskalerria gure sorterri,
seme zintzoen kabia,
bere odolak ez dau alderik
bizi-bizi ta gorria;
semeak bere alantxe dabe
edergailluzko bizia,
erri arnasaz beterik dagoz
Maitatuz Euskalerria.

Gure izkuntzak zoratu ditu
jakitun diran jendeak,
ain da ederra, ain aberatsa,
bera letz bere semeak;
jakiturizko izkuntza dala
diño e gizon trebeak,
gora euskera, gora arbasoak,
Euskadiren sortzailleak.

Eusko langille alkartasuna
oroitu nai dot lurrean,
zure legeak onenak ziran
mundu langille artean;
begira bati, Lege Zarrari
zuen lan zuzenbidean,
eta onenak izango dira
gero be aurrerantzian.

JAUN PRESTUAK

Ongi etorri jaun autatuak,
zuen etxe onetara,
orma barriak... ateak zabal
daukaz zuen omenera;
gizon prestuak, alan, bear dau
adiskidetasunera,
aurki barriak oiñak kokatuz
egokera ederrera.

Gure seigarren bailera onek
ba-dituz gizon argiak,
oroz goitikan bear dan legez
seme leial langilleak;
ekin ta jarrai diarduzue
urratzen jokabidiak,
argi barriak argitu daizan
kristauen burubidiak.

Kristau erriak izan bear dau
lur ontan gatz ta argia,
berau dalako mundu baltzean
Maisuaren irudia;
egitekorik neketsuena
gizonak argitutia,
zorioneko maillara doa
ortan doan izerdia.

Zeru altutik begira dago
lur illunaren sorlea,
jendea dakus arrokerizko
puts ustelez betea;
mundu orretan zabaldu bear
egiaren txinparteak,
burruka ortan agertuten da
apaiz trebien alea.

PAULIN